


TRUTH CENTERED TRANSFORMATION

MODULE



EDUKONE KA EKALE EITAABO LOKA ESISIAN

Asisian 1: Ipelueik Luka Ikiliok Ka Angor

Ipelueik Luka Ekilokit

Kosiom 1 Ikorinton 13:4-8, Ipilipin 2:1-8 Kosodi Yokana 13:2-17 ido obongonok Aingiseta Nu etupakinete:

- 1 Koipone aani itetemutotor angin idiope kotoma okokoron kalu amina naka Edeke ?
 - 1 Ikorinton 13:4-8
 - Ipilipin 2:1-8
 - Yokana 13:2-17
- 2 Nunyoika nut ti iswamau Timeo (kotoma aitetemuuneta wok nu sek igeunit aisisian) kanu aminun akeberu, Leah koipone lo isisianakina Ebaibuli?
- 3 Koipone aani epedoria ekilokit aitodiar amina kanuka akeberu koipone kwape kangon kotoma owitin kalu? Kotoma ogurupun kus itolomuutu iboro 10 lu ibwaikina toma aswamusioit lu ti epedori ekilokit aiswamaenen kanu aitodiara amina na eipone kanat kalo kanuka akeberu.
- 4 Nunyoika epote aiswamaun arai mam ekilokit itodolikini epelu ke kwape itetemuunitor Ebaibuli?
- 5 Orai ekilokit oyaite akeberu kwa isisianakina Ebaibuli, nunyoika ti iwomit ijo eyangau ejautene kangon nejai edukone?

Epelu Loka Aberu

Kosiom Ageun 2:18, 20, Ikisila 33:29, Ipeson 5: 22, 24, 33

1. Lunyoika bo ti icie iboro lu iswamau Leah kanu araunt 'akengarakinan' kosodi ti ayaite Timeo nepepe ka ayingio?
2. Lunyoika bo icie owaitin lu arautu 'akengarakinan' ka aitodiar anonokikinit naka edekeone ka ayongio mama ejaasi ikiliok? Kotoma ogurupun, otamata aoomoomoun aanyununeta 10.
3. Koipone ti aani ijulakina edukone orai aberu kiswaama iboro kanat kalu?
4. Nunyoika epote aiswamaun arai aberu itodolikini epelu ke kwape itetemuunitor Ebaibuli?

Asisian 1: Aiwadikaunet Na Ikamanara kede Amina Ka Ayongio

Ecamutos itunga luipu, mam edukone duc epatana. Aciepakio emina teni cut araun lo etiono teni teni. Ibusakinit Na owaiwok / Lo waiwok orai epapero wok lotau/ apapero wok na otau ido orai akengarakinan na epol noi kakere kakwapu. Konye mam duc erai kwangin, irwana ipuu, imusungenenei ooni yenicie wok bonik ka bonik / arai bo nat ejie da. Kanuinyo epatanikitor ipegeta atakanuunun ido koipone aani ipedoria ooni aitikokin kesi?

Edaunit Edeke aitudumikin abongonokineta toma Obaibuli. Ediopet kotoma okokoron lu epolok noi kanuka Edukone ngesi Ipeson 5. Ipu Ikristayon lu ejenete ikokoron luu Ojokan noi, konye ibusakinit ooni asesen bobo ekokoro lo awasia.

*Ejaa ngun da, angin itunganan kayesi da ibusakinit amina aberuke kwape eminar akuwan ke elopet bon, kosodi aberu ibusakinit ayongite okilenik.
Ipeson 5:33*

Kiinakitai ooni aicorakineta aarei nu epataka; adiopet kanuka Ekilokit kosodi adiopet kanuka Aberu. Ikiliok **KOMINASI** akusingor . Angor, **KOYONGITOS** ikusikiliok. Kanuinyo iwomitor ijo itegelikinar? Kanuinyo elimokitere angor Ayongit ido Ikiliok elimokitai Amina? Naarai ejeni Edeke oni, ejeni ojokan ibore yeni ipuda ooni. Ejeni ebe ipudasi ikiliok Ayongio ido ipudasi angor Aminunio. Eebo ejokit ikiliok ominatete kesi, ido angor ayongio, konye isimaaritos ikiliok Ayongio ido angor Amina.

Kanuka angor, epedorete nuu araun akiro nu isuumuikinet kesi. Angor nuipu eomitos ebe eminaso ikiliok akecewate, ekotosi aminunio. Kotoma abeit, aisisianakineta nuipu iteete noi noi amina bon. Aisisianakin angor ayongite ikiliok kec esubit bala emurokin. Angor noi noi eomitos ebe ekotosi ikiliok kec aminunio adepar kwa ekototor kesi ayongio. Konye mam ngon eipone erai lo edolit.

Arai isesen ooni owaitin lu egelegela, iwanyuni oni aanyununeta nu egelegela ne eraar eipud loka ikiliok loka ayongio ido loka angor erai loka Aminunio. Kotoma ajore , aiboisit naipu ikiliok kotoma, ainakinio ayongio ka angosibib kesi nu epolok noi. ipudasi / imwelasi noi ikiliok akunyakin / aiyatakin adoketai tetere edumunete adoketai na iyatakina naka ayongio. Iponesio lu amwanganut mam iteikinio nepecep da kama ejai idio itunganan. Amamus amina Ekomanda, mam erai ationis. Mam ikomandas ipudasi onaikitete kesi amina; ipudasi oyongitete kesi.

Konye owai kaje, arai isesen ijo aiwadikaeta nu ikamanara kede angor “women’s magazines” iwanyuni ijo ebe nuipu kakesi epodokitos noi noi nu ikamunitos aminunio, ajaikin akoniijar orai na eminaana noi. iswamaete angor iboro lu egelegela kanu tetere emunio noi adepar. Akurianu na epol noi naka aberu ngesi nata ebe mam itunga eminaso aminun / aisimaarite ngesi. Mam erai kwangin kede ikiliok, kane ejaasi ikiliok akurianu kec naepol noi ngesi nata ebe mam eponio ayongite kesi.

Arai ikoto ooni aanyun edukone wok itojokaar, ibusakinit ooni aanyun ebe irimaarit ooni aicorakineta nata naepol nasodit. Ikiliok kominasi angora kus, yesi da angor kwape kwangin oyongitos ikiliok kus.

Ainingosia Nu Ejaasi Toma Oiner

Kanu aiswamaun nuu, ibusakinit ooni amisiikin ewai bobo ecie lo epol noi – Einer. ikiliok ka angor ineranansi eipud kec kanuka ayongio / aminunio koipone kalo itegelikina noi kakere. Nuduc inerasi angor mere kesi nu epupete ikiliok. ido da, nu etamitos ikiliok einer mere kesi nu epupete angor.

Biyai ijo lem ijeni? Eipone lo ineratar angor lo epupiata kesi bala mam emina, ngesi duc ijaikit ikiliok aipupu bala emwangitai kesi. Ido eipone lo ebongokinatar ikiliok ne epupiata bala emwangitai, ijaikini angor aiyatakin aipup amamus aminunio. Enyaritos icie itunga ejautene loo kwape **aiweniwenuna na epurujai “crazy cycle”** – Ikoto ooni aminunio ka ayongio, konye eineri wok ijaikinit luyarei keere aipup bala mam nepecep emina ido yenicie da opupi bala mam nepecep da eyongitai.

Aibilerikit ngesi ne inyoginyoga ooni aswamu ibore ngipe- ngin — ducu duc / arai irwana - irwan — ido omameete nu ejokuka ejaasi aiswamaun. Mam epedori! Ekotokin ooni aitolomuun aijulakinet kanu ooni aanyun akiro nu itegelikinos ne epupunatar ikiliok ayongio ido opupete angor da aminunio.

Kanu aingarakin ooni amisiikin nuu ojokan, aso aanyutu akirot na abu kojaun kane:

Abu korai esabiiti lo ationo noi aswamu omisiri. Ido noi noi akolong, amwana noi ne mam ijo ipedori angirikinit da angina omisiri ido odite ariripoinikin. Ajai Van elakara noi naarai kotoma apaki naedite, adodor ngesi abongun ore aanyun akeberu. Abu lem odau apaarasia 10 emamei ore ido aajaara apaki ngin noi elwana ngesi kama ejai ekale. Kwa ajaari ngesi irengei amotoka orot amuno ngesi ti na okale ke da elakara aanyun ngesi kwape alakarar ngesi aanyun na owaikie.

Ajai Thuy ore epasit akaulo na autaara kede iduwe omamei yeni ingarakit, ido itikadikina naarai asubitos bala mam ecamutos aipup ngesi. Ojai etauke noi imiela okilenike abongun ore. Abu nan osawan icie inomakite okilenike esimu aisiitikin ngesi ainuna ikoku akile ebonguni ngesi ore. Mam ngesi apedori anyoun ore alosior nen dio naarai etiono aupar kede iduwe kere nen dio. Ajai ngesi emuno ebe isunyari lowaika abongun atipet — adau kwana ikoku agear aitapasa ngesi aimony ido omamei ibore yeni ebeit ngesi aitanyamikin ikoku.

“Edolu eong ore,” ebala Van elimor.”

“Adolun do konye na!” ebala Thuy. “Aani bo akile ikoku?”

“Atakai,” ebongokini Van, “Emurokisi eong — epuu do ber eong akiro swii akou lolo.”

“Ikwaikini ijo ai imurokinete akile?” epupi kwana Thuy ebe ekeun ekeporoto kuju kede anyunyura. “inyobo do kwana elosi ikoku ainyam?”

“Biyai emamei do bobo ijo idio ibore icie kere? Biyai mam ngesi da epedori do ber ainyam lu inyami oni?”

“Mam cabo ba! Biyai ikoto do bobo ijo yaa odekakin? Eroko yaa erai ikoku. Acie apakio etei eong bala ipodokit ijo noi nu ikamunitos ipaperokon adepar ekale. Mam imurokini ijo alosit eilat kinga ematet ecai kede ipaperokon.”

“Mam acie, Eong alot aomere!” aresiaar do kwana Van da olomari kinga. Aiyalama nasek na ajaatatar angin idiope kakesi aomisio ke kanu aanyun yenicie, ewiror pit

(adaun nen pit) araun do kwana anyunyura ka aitiguikina naka etau (emusunguunos aomisio.).

Karaida aticepak itegelinikina ejautene loka oreria wok, konye ipegeta duc eputoonoro. Ibusakinit ooni asesen adepar nu inera kanu amisiikin nu iswamasi. Ibore ibusakinit ooni aitunit ngesi yenita ajokis naka **Amina nejaasi Angor** kosodi **Ayongio nejaasi Ikiliok**. Ne egearatar angor anyunyurikin, arai aitikadikin erai ibore yen ejena ebe epupi ngesi amamus aminunio. Ne enyunyurikinotor ikiliok, arai amamus einer erai duc naarai ejaasi epupete emwangitai.

Aso asesenata ber bobo ooni ejautene loo kotoma “alabirai” (**agalibitin**) nuka Amina ka Ayongio.

Emurokisi Van akile nuka ikoku. Erai na ationis na edite noi emamei ibore ibusakinit aluwor araun epeget lo epol. Epedori Van alosite oiduuka kosodi agwelaun akile acie kanen. Igurokinos ikiliok duc akwesi ibore ijaikin akirot na edite noi araun ationis na epol (aitanynyaario). Ibore ibusakinit Van amisiikin ngesi nata ebe ne emurokiniata ngesi akile, abu Thuy opup amamus aminunio. Abu ngesi olimokite ngesi idiope ibore bon, konye adau ngesi apaarasia nuipu awai (emamei). Kanuinyo mam ngesi apedoritor aitun idiope ibore ngipengin bon? Biyai ngesi da abu imorokite ngesi kwape aberuke? Biyai ngesi teni arai na mam nuke epolok? Aso abu ipaa lowaika kede aitoronaaret. “Ikwaikini ijo ai iswamauni ngun?” Mam Van emisiikinit ebe epupi na owaika amamus aminunio. Esesen ngesi aitikadikinet ke bon, ido epupi amamus ayongio. Kosodi apupun Aitikadikinio. Arai aibucaret nateni abeit; mam ngesi apeleikit amurokin agwelun akile. Kanu naarai mam ngesi abu iyatak aisiitikin na owaika nuka amina ke, abu kosuroki bobo. “Mam ijo ipodokit isio. Ipodo ijo noi noi nu ikamunit ipapero kon.” Kwana do ajai do bobo ngesi aitikadikin noi, ejai asurokin eipone loka okilenike. Ekoto aberuke aitodikin ngesi eipone lo epupia etauke apipilu noi ka amamus aminunio.

Ejaa ngun da, abu Van kopup akiro ngun kosodi ayangaar koipone lo anyunyurikin ka anyoun alungar alomar kinga. Epupi ngesi amwangio cut noi koipone lo etoronaarere ngesi. Mam ngesi epedorit acamun ebe apedori aberuke alimokin ngesi ibore kwa nat ka ngin. Kanuinyo itoronaritor ngesi kanu amamus apodo kesi konye ojai ngesi eutaara aswamu esabiiti ngon keere tetere edumuni eipone lo aidaria ekale ke? Abu onyou atipet noi eroko ngesi elimuna icie ibore yeni aronon noi, arai bo nat na eroko do noi kakere, adolokin amumuor. Idila duc angor aitikadikin noi arai enyou ekilok alungar kinga arai aililingikin amamus einer ka nges. Mam angor ecamunitos ebe mam ikiliok epodokitos kitoni aitemokin engunget lo ejai kiding kec. Eminakit angor einer, ido ne ejaatatar ka ationis ka nucie angor apaupakec, idila duc kesi einer kitoni ne itemokinotor ngun. Konye ikiliok enyounete alomar kinga. Kanuka angun, egearete angor ainomaar bala mam ikiliok kec eminasi kesi ojokan nges mam ber ekototor aitam aitemokin akiro. Iyatakin do aipup kec na amamus aminunio. Ibore ibusakinit angor amisiikin ngesi nata ebe enyounete ikiliok alomar kinga naarai apuputu aitiipilun noi ka anyunyurikin da, mam kesi ejenete eipone lo obongokinet arai bo mam emunokina bala eminasi olimutu akirot najokan. Enyounete alomar kinga naarai emootos eipone lo oyuwaret ijo naarai eminasi kesi yesi !

**Ne egearatar Angor
anyunyurikin / arai
Aitikadikin erai apolouke
ebe Epupi ngesi amamus
Aminunio. Owai kaje,
Ne enyunyurikinotor
ikiliok / arai Aililingikin
Mam ekotosi einer, Erai
naarai epupete kesi
Amwangio Ka Amamus
Ayongio.**

Esalakit Van eumokit kanuinyo etopoloora Thuy akiro nu akile kwangin toni araun ecelet. Ibore ekoto Van kojenu ka lucie da ikiliok ngesi nata, mam akile erai ationis, ationis ngesi nata, abu Thuy koipone lo amwanganut okoto Van aitoduun amina ke. Akoto ngesi okilenike aitoduun ebe ebucarit ngesi kosodi ti ailip aitimio, konye naarai abu ngesi kopup asurokinio, ka amamus ainakinio ayongio, abu obongok ka anyunyura. Ibore yeni do bobo yeni abu komunaa kakere, araasi lu keere lu ajaasi kede aipudakina (aimuit) naka airiamun akaulo na apak lem atubor elwanikina. Arerengu na aronon, ainapeta kec nu ajaun ka abong na italakaara / na epol aiyalama, abu omunaun ido etakani emina apotu ojaunos kede abong na anyunyuratar bonik ka bonik.

Ikiliok ka angor esesenete iboro koipone kalo itegelikina. Arai irai ijo aberu, aticepak ipupi ijo aitimokit Thuy. Ejai lemu ngesi ore apaarasia atomon ngesi bon. Epuda ngesi aingarakinio. Arai irai ijo ekilokit, aticepak ipupi ijo aitimosit kanuka Van. Apasit ngesi, abu odaunite esabiiti kere, iswamai omanikor / amisirin kanu aituduminikinia ipudesia luka okale ke. Konye abu bobo imurok! Biyai mam aberu abu omisiik ebe eswamai Van aswamu ngin keere kanuke ka ekale!

Epatana aipup aitimokinio kanu kayeni ciekon (yeni beru ka naberu, lokilokit ka lukiliok) naarai imisiikinit ooni eomoomoe wok. Emisikitos angor eipone lo eomoomaatar nucie angor. Ikiliok emisikitos eipone lo eomoomatar lucie ikiliok. **Konye arai ikoto ooni ajaun kede edukone lo italakaara / lo iyalamana, ibusakinit ooni amisiikin ojokan eipone lo eomoomaa locie ewai (angor amisiikin kwa eomoomaatar ikiliok, ikiliok amisiikin kwa eomoomaata angor).** Ekoto angor amisiikin ebe aitoronaar epupo kwape emwangit kama ejaasi ikiliok. Ikiliok da ekoto amisiikin ebee ipup ijo angor engurianete, itoronitos, arai emonyete, erai naarai epupete amamus aminunio.

Kwape kwana ipedora ijo aanyun uu ka apatanu eraun **aiweniwenuna na epurujai “a crazy cycle.”** Ne iyatakina aberu aipup amamus aminunio noi, ngesi iyatakina aitorononen ka angurian. Ne iyatakina aitorononen ka angurian, ngesi iyatakina ekilikit aipup amwangio / ka amamus ayongio kosodi aiya akeberu koipone lo mam eminaana.

Aiyeyea naka edukone lo italakaara / lo iyalamana, ngesi aisujuk aiweniwenana ngin. ibusakinit ooni alosenen kotoma arimaarit Edeke arai epetana arai mam. Eitutos ekokoro lo ejai toma lpeson 5:33. Ikiliok ibusakinit yesi amina akusingor, Yesi angor ibusakinit yesi ayongit ikiliok kus. Nu kesi icorakit Edeke.

- **Angor** – otamata aitun ne inguriana yesi ka aitoronarit, epupete ikiliok amamus ainakinio ayongio. Arai enyou alomar kinga, aililinguun, arai aresiar kede eporoto lo ededeng, erai naarai epupete amwangio / arai amamus ainakinio ayongio. Ingitakin ber ijo bon, “Biyai nu edodor / ebeit eong alimun / arai aiswamaun emisiiikinio kwape amamus ayongi / emwangit?”
- **Ikiliok** – otam aitun ne enguriana akoniberu, iswamai kwangin naarai epupi ngesi amamus aminunio. Ne inyouna ijo alungar arai aililinguun, arai bo nat aresiaar adedengar ijaikini ijo kesi aipup do noi amamus aminunio. Eroko ijo inera arai aiswamaun adio akirot keere, ingitakin ber ijo bon, “Biyai nu edodor / ebeit eong alimun / aiswamaun, eponio amisiikin kwape amina arai bo amamus aminanut.”

Asisian 2: Amisiikin Aitegelinikineta Wok

1. Kanu angin Akirot na Esisiai (Etopik) iwadikaik **X** Ne ejai ewai lo eminakit ijo.
2. Kanu angin Akirot na Esisiai (Etopik) iwadikaik **O** Ne ejai ewai lo eminakit Na owaikon / Lo owaikon arai bo nat ipapero kon.

Amamus Acamanara / ingungeta		
Aitemokin atipet	_____	Aidarite ainapakin
isirigin		
Aitwasam	_____	Aimono/ Aingadanakin
itunga		
Ayangaikit Apak Aiboi kede Lucie	_____	Ayangaikit Apak Aiboi bon
Aitolomuunun Ainapeta		
Aitolomuunun Ainapeta ka Asalite Nepenen	_____	idio ibore Yepe Etakanuuni
Aidarite Apak		
Adolun Sek	_____	Adolun nepe Edoli Esawa / arai Aiyapite
Aipup Ailajaara / Adumun Aiyengun		
Alosite Eilate	_____	Aiboi Ore
Ajoo		
Aiyap Alosite Ajoo	_____	Alingakin Akwenyun
Aboliasio		
Emina Etau Noi	_____	Mam Eminakit
igoen		
Lu Ariamara Ked Eswaman	_____	Mam Epodokit Lu Epol Etiai
Aidara Aila		
Elai Noi	_____	inyalasi iboro tai otogo
T.V.		
Agwetakit	_____	Acakar Kinga

Nunyoika bo acie kotoma aitegelinikinetu nu etolomuutu engunget kotoma oidicane kus?

3. Itodik yenicie kon nu iwadikainik ijo apapula kon kosodete aimor aitamitam:
 - a. Biyai ijo ijaatatar amisiikinet naejok na ikamunit iboro lu eminakitos yenicie kon? Biyai ejai icie ibore yeni abu isumuik ijo?
 - b. Biyai ijo kede na / lo owaikon / arai itunganan yen okale eputoonoro abongonokineta kus kanuka angin Akirot na isisiatai / etopik?
 - c. Toma owaitin bo aanu ipuwakatar nu ipototor yesi ido opatanikite yesi acamanar?
 - d. Toma owaitin bo aanu itegelinikatar yesi noi kakere?
 - e. Akau Na Akirot bo aanu nu etolomuutu amamus acamanara kotoma odukone kon?
 - f. Omorata einer eipone lo ipedoriata yesi aitetenaanar iwaitin luu aitegelinikina kus luu?
 - g. Koipone aani ipedoria ijo aitwasam agogongu na yenicie kon adukunia edukone kus / arai eidicane kus?

Arai mam ijo idukokina adaun aojau naepol, apolouke ebe itegelinikina yesi owaitin luipu kakesi. Aiboisit na aitam aijulakin yenicie kon, ibusakinit ijo airereor iwaitin lu agogongu kec kosodi aingarakin kesi kotoma owaitin lu enonokatar kesi.

4. Itolomuu ainapeta nu itemonokinet / itetenanaratar iwaitin lu ejaar yesi aitegelikina noi. Koseutu iwaitin 2 luka agelegela kosodi aiwadikaun ainapeta kon kanu eipone lo ilosio ijo aitemokin / aitetenanaara kesi.

Aanyunet 1 – isirigin

Arai eminakit yeni owaikon aitwasam isirigin ido ijo ominakite aimonoinikin, aso do itolomuutu ainapeta nu itwasamatar yesi icie isirigin kosodi eipone lo imonoinikinatar yesi icie isirigin. Arai bo yesi acamanar etiai lo isirigin lu imonoinikina, konye ekoto ojaasi akaniberu ka icie lu itwasamai kangin esabiiti / angin elap kanuka ipudesia luka ekale otupitete nu icamanaros yesi nepepe.

Aanyunet 2 – Aipup Ailajaara

Arai erai eipone kon lo aipup ailajaara / Adumun Aiyengun lo ijo ajaute ore ido ominakite yeni owaikon alosenen eilate kinga aiboisio acie, ekoto yesi acamanar oipone lo ipedoriata yesi kere luyarei aiyalamikin. Epedorete yesi acamanar alosit eilate akuware adiopet kangon esabiiti kosodete aiboikin ore ailajaara, kosodete bobo aipup ailajaara nepepe akuware adiope angin esabiiti. Arai bo icamanaros ebe adaun akuware adiopet arai aarei, kotoma osabiiti yeni owaikon alosite aipup ailajaara aiboisit acie kinga na okale kus opaikini ijo ore.

Ainapeta Kosi:

1.

2.

Asisian 2: Aitemonokin Amamus Acamanara

Kosiom angin ekokoro Angin ekokoro, iwadik akiro nu epolok atupakin nu ikamunitos eipone lo itemonokinet amamus acamanara wok.

EKOKORO	AKIROT NA EPOL ATUPAKIN
Matayo 7:3-5	
Matayo 18:15	
Awaragasia 15:1	
Ikolosain 4:6	
Ipilipin 2:3	
Ipeson 4:26	
Awaragasia 19:11	

Asisian 3: Aisisiaun Ka Amisiikin Aitipipileta

“Kanuka angun, arai ijai ijo ayangaar ainakinet otem (olutaari) kosodi ijo aitun ebe ejaa ijo akiro ka onacekon, ojalak ainakinet kon kanen oingaren naka elutaari. Ogee ber obongo itemokisi akiro ijo ka onacekon, ido konye obu koinak ainakinet kon. Matayo 5:23-24

Koyangaik Apak ijo Ber Bon Aitoonor Nu Isisiau

Ilip Edeke aitodikin ijo arai ejaasi icie kotoma owaitin lu itipipilitor ijo na owaikon / Lo owaikn. Arai mam ijo idukokina, oomoom nu ikamunitos ipapero yeni minat arai bo itunganan yeni okale. Oomoom nu ikamunitos iwaitin luta kosodi iwadikau nu iwomit ijo (*aomisio kon*):

- Biyai ejai idio ibore yeni amenaa / akuroki ijo aswamu yeni ti abeit ijo iswamai?
- Biyai ejai idio ibore yeni iswamau ijo (arai bo ijai ijo aswamu) yeni ti mam abeit ijo aswamu?
- Biyai ijo akuroki aisilosikin ipudesia luka kana owaikon / kalo owaikon kotoma edio eipone kere?
- Biyai ijo ilimunitor idio ibore yeni arai yeni etipipili ?
- Biyai ijo akuroki aitodiar amina kede aisinyikoikinio ?

“Arai ediaka onacekon arai inacikon kama kon, kolot itodik kesi aibucaret kec, kiding yesi iyarei.” Matayo 18:15

Koyangaik Apak ijo Ber Bon Aitoonor Nu Isisiau

Biyai ejaasi iwaitin lu itipipilitor ijo na / lo owikon? Aticepak erai ibore yeni abu yeni owaikon omisiik ebe etipipil ijo arai bo mam abu omisiik da.

Aibwaikin Toma Aswamisioit

ilip kosodi ainakin aitegear aimor aitamitam iboro luu / akiro nuu nepepe kana owaikon / kalo owaikon osabiiti kalo.

Asisian 3: Adokena Kanu Abilakin Ailip Aitimio

Adokena kanu Abilakin Ailipi Aitimio kanu Ainyakun Aisiteteun iidicasinei Ne itipipilitor ijo lucie:

1. **Itironikin mama Ejai Edeke** – Ne itipipilia /imusungia ooni yeni owaiwok ijai ooni da bobo aimwang Edeke. ibusakinit ooni alosite nejai Edeke kasodete ailip aitimio ke kanu iswamaa ooni numam ejokuka. Acamun aitimio naka Edeke einakina ooni etau loebilakina aitoronikin ka ailip aitimio kama ejai itunganan ice.
2. **Itironikin mama ejai yeni icie itunganan komam ijainikini aoyianari** – Neduc itironikinor oni ikoto ooni aitetemuun kanu inyo apotu ooni eswamaunatar nu apotu ooni eswamautu. Konye ejaa ngun da, emina nen ijaik yenicie itunganan ationikin aitim ooni.

Aanyunet Na 1:

Aitoron: Ajeni eong abu eong etoron ijo koingaren naka ipaperokon biyan, konye ti mam eong eswamaunit kwangen orai ijo komam aijaikin isio aiyap adaun esawa ediope kere.

Naibecokina: Abu eong etipipil / emusung ijo biyan koipone lo aitoron ijo koingaren naka ipaperokon; arai ngin aswamusioit namam ajokuna kamaka.

Aanyunet Na 2:

Aitoron: Ajeni eong akuware na abiyen apolo eong anyunyura noi ido adedeng eong asurokite ijo, konye akoto ti ijo aitunit ebee toto nakon da apakio nupenuu icebokit aitecelenen eong, ido bobo apasite eong aswamu na lolo ngin kere.

Naibecokina: Arai cut ibore yeni asil mam etodiarit asianu naka etau eong anyunyurikin ka adedengikit ijo adoketait kangin akuware na abiyen. itimoi eong kanu aitimio ijo.

itiirian aanyununeta ngun aarei nu okuju. Owai bo ti aani kakesi nepetai ti itwasam ijo aitimia?

3. **Obilakin Ailip Aitimio** – koanyu ebee itebeikit ijo alimun nu ikamunitos ibore yeni ipupiya erono kanuka aswamusioit kon kosodi aitodiar aiturur kabeitonut otai. Olimu icie ibore bala nat “itimio eong noi noi kanu abu eong eswamau arai bo nat ebee apupi eong erono noi noi kanu ikamuutos eipone lo abu eong ayangaara ijo.”
4. **ilip Aitimio** – ibusakinit ooni amisiikin ebe ipuda ooni aitimio. Aticepak mam ipaupakon ekapakina aitim ijo atipet atipet, kanuka angun, emina okoto ooni atitingikinite. ilip ebee opedo Edeke aingarakin ipaupakon aitim ijo. Mam ekotokin ijo abuikin kesi alimun ebe etimoto ijo komam erai kotoma akotekec.
5. **Ijulak iponesio kon** – Mam isilosikina oni aitironikin ka abilakin ailip aitimio arai mam ooni ikapakina kanu aijulakin ido apelekites ainyikokite aiswamaunun aibucaret kwape kangipe kangin. Ediope eipone lo aitemun aisiteteun eidicane ngesi aanyun ebee iinakina ijo ido opelekite eipone lo aijulakin iponesio kon da. Kadoketait na ipedoro ijo kere kotam aanyun ebee mam ijo iswamauni bobo.

- 6. Ocamu Nu Epote Aitereikin kajo** – Aticepak emina itunganan ipuda apak kanu aitim ijo, ibusakinit ijo atitingu kede iyunganan ngin ido ilipi Edeke ingarak kesi aitim ijo. Aitipipileta / amusungun acie aticepak eminas komudiaasi Amuno kotoma oidicane. Ibusakinit ijo amissikin ebee aticepak mam na owaikon / lo owaikon emina opatanik amunokina ijo kwape ajaar bin sek. Erai ngun nu ayangautu aswamisio kon. Abilakin ailip aitimio mam erasakini kotenan aituluor ibore / akiro kere aitetiaar. Apakio acie era ijo apaikite ijari nepepe kede nu edupoosi aswamusio kon ijo itori toma. Eyangaikini apak kanu amusungut / aitipipilet na abu ijo idupo iswamaun anyoun awai kama kon.

Asisian 4: Adokena Kanu Aitimio

Arai eari aitipipilet na abu ijo odum na adite, aticepak emina opatanik aitor toma adokena nuu. Arai epol aimusungio / aitipipilet, aticepak eyangaikini ewai lo apak na iyatakina.

1. Ocamu amisiikin ebe nu aponi iswamaikinai ijo mam araasi nu ajokuka / mam ebecokina
2. Ocamu angin anyunyura kere na abu ijo itodia ka eipud kon lo aitipipil yenicie itungan
3. ilipi Edeke ingaraki ijo aitim yenicie itungan
4. Koseu aitojokaar amamus aishwamaun enyangit
5. Ocamu aipal eipud kon lo akoto aitipipil / aimusung yenicie itungan
6. Ojalakina aswamusioit naka etube mama ejai Edeke
7. Olimok / ilipi Edeke olema awai adwaris adio kere ka aitunyorikina kama kon
8. ilip Edeke itangaleu apipilu kon ka numam ajokuka kere nu opotu iswamaikinos toma aijara kon

Aimor Aitamitam Ogurupu Lo Edit

- Aanu bo kotoma adoketa nu aitim nu etionikitos ijo kakere?
- Nunyoika bo ti ingarakisi ijo aitapatan adoketa nuu?

Aibwaikin Adokena Nuka Aitimio Toma Aswamisioit

inyoin bo idiope ibore yeni ibusakinitor ijo aitimia amucalata kon / arai ejakait kon?

Arai mam ijo ipedori aomoomun idio ibore yeni ikamanara nepepe ka na owaikon / lo owaikon, aso oomoom nu ikamunitos icie itungan yeni aticepak abu iswamaik ijo numam ibusakinito. Arai mam ijo ipedori aomoomoun idio ibore, aso do ilip kaililinga kanu angun lu itoritos toma ojaute kalo.

Omudukik kosodi apupokin ka aomoom kwape esiomere angin adiopot kotoma adokena kanu.

Asisian 5: Angajepa Akany nuka Amina

Angajepa Akany Nu Egelegela Nuka Amina.

Egelegela itunga ido ejaasi ka iwaitin lu egelegela lu ijaunia ooni amina. Arai itodia oni amina kotoma owai lo itegelikina kama ejai eipone lo epupiata yeni owaikon aminunio noi kakere, apolouke esubit bala inera oni angajep na itegelikina mama ejaasi kesi ido aticepak, mam eminasi opuputu aminunio. imina oni enerasi, konye mam kesi emisiikitos. Arai ikoto ooni ainerakin ka yen owai wok (*okilenikon / akoniberu*) apolouke ekoto ooni einer angajepe kec. ikoni kwape kwangin ka Amina da, ekoto ooni aisisiaun angajep naka yenicie wok naka amina tetere oni ipedori aitodiar amina mama kec koipone lo epedorata kesi amisiikin kojokan.

Ejaasi Angajepa Akany nu egelegela nuka Amina. Angajepa. Kosiom angin adiopet kakesi kosodi Aomoom nuka iwaitin **2 toni 4** lu itebeikina lu ipedoria ijo aiswamaun nuu kotoma odukone kus.

1. **Aijaanakin Yenicie kon** – itunga icie epupunete aminunio noi arai iswamaik oni ikulepek kesi iboro ngun. Epedorete lu oraasi iboro lu epataka - epataka, (*konye ejai apolou kec*) kwape nat aitalaun etogo (*aiputun agoola*), ailot asaanin, igoen, arutonor eduwan, apiyar alaro kacie da.
2. **Akiro Nu itojokaaritos ngesi** – itunga icie epupete aminunio noi ne inerar oni iboro lu ejokuka kanu ayenicie wok. Eminasi oraasi aisimanareta kwape nat, “ipoi ijo ejok noi” arai bo nat “ijaatatar ijo itima lu elaete” arai bo nat “irai ijo toto najokan noi.” Eminasi oraasi akiro nu aiyalama arai bo nat akiro nu aisilamikite kesi “Eyalama aipoo inyamata lu abong.” “Eyalama aswamu kagogongu noi kanu aituduminikina ipudesia luka okale.”
3. **Ainanakineta** – itunga icie epupete aminunio noi ne ijaikina oni ibore mama ejai yenicie wok. Mam ainanakineta iburai oraasi nu epol ebei noi arai bo nat lu eyangaikinete isirigin. Emina oraun ibore yene epatana itorunit ijo orot ibonguni ore arai bo nat ainerasit na emai yenicie kon na iwadikaunit ijo.
4. **Atironoreta / Atingiting yenicie kon** – itunga icie epupete aminunio noi kotoma atironoreta / atinganakin ka kesi. imoriaritos nu iboro kere agear aitingite yenicie kon akan iupasi, aijaun kainu, arai aisimarite ararapaar itima kayenicie kon.
5. **Ayangaikin Apak Na ipeleikit Oni Ber Bon Nepepe** – itunga ice epupete aminunio noi ne iyangaikina apak naepol ejok nepepe ka kesi. Mam na ekoto orai ebe ijaa oni kere toma agoola adiope konye eswamaete iboro lu egelegela angin itunganan kanuke bon. Ekoto orai ebe ipeleikit oni ainakin yenicie wok apak na erai kanuke bon komamei adio aitolitolet. Kotoma ekalia wok lu epol aswamu, eari apolouke ebee oni aupa nepepe asakasakaete eilate moti-mot amorete eipone lo alositor apaaran na angin idiope kaoni.

imina ijo isisiau ebe ecamanara na owaikon / lo owaikon kede angajep adiope naka amina noi noi adepar nucie. Angin itunganan ejaasi ka aisimaanareta kec ikulepek. Otamak aisisiaun aani bo kotoma owaitin kangun lu aitodiar amina erai na iriamara kede etau kana owaikon / kalo owaikon kakere kosodi inyikokin aiswamaenen eipone kangon noi noi odukone kus.

Asisian 6: Angor Ka Apesur

Kosiom angin adiopet kotoma Alimuneta kanu kodete Aimor Aitamitam arai icamanara yesi, arai bo mam yesi icamanara kede Alimuneta nuu ido kanuinyo.

Alimuneta	Biyai Yesi icamanara / arai bo Mam icamanara? Ido Kanuinyo?
"Eraasi Apesur Egaraama mama ejai Ekale Kec."	
"Mam ebeit angor ajautu kede alupok arai adumun airumet."	
"Eebo ejok aibunga aberu na mam erimaana."	
"Erai angor nu iteio ebeit aite - aite konye mam ebeit kesi airario."	

Alimuneta Nu eipone enyoin nu ipedori ijo aoomoun kotoma oinono kon obe nu itodiaritos aitegelikineta kanu ipudakinai ikiliok kanu ipudakinai angor ? Biyai ijo icamanara nepepe ka kesi?

Kosiom Ageun 1:27-28.

Ekokoro loo itodikit ooni ebe luyarei keere ikiliok ka angor esubunitai kotoma aputo / asima naka Edeke. itolomu / iwadikau iponesio / iboro lu itoduutos eipone lo itodikitotor angor kede apesur ooni aputo / asima naka Edeke.

Nunyoika iswwamaunos arai mam aberu etupakini ikisila luka einono kanu ipudakinai?

Koipone aani epupunianata lucie itunga lu okale ke kwana (okilenike, auriak, imurak)?

Asisian 6: Einono Loka Yesu Ka Iwaitin

Lolo ilosi ooni asesen eipone lo asesenere angor kotoma apakio naku Yesu ka eipone lo abu Yesu oyaitor angor. Abu Yesu itolomuu aitegelikinet kotoma oinono ke ido ipedori oni da aitolomuun aitegelikinet kotoma oinono wok. Kosiomata ogurupun Kus Ludidik kosodete Aimor Aitamitam Aingiseta nu etupakinete apapula na iyareikini.

Einono Loka Yesu:

Ikisila luka Iyudayan ka Iromayon nepepe ka iinonosio ainakitos ameda na edite mama ejaasi angor. Eteio angor kwape nu adite adoketai na ajokis ido mam araasi nu apolok nukec) mama ejaasi ikiliok.

- **Ayaitai angor kwape “iboro lu ebeitai” (iboro itunganan).** Mam kesi araasi nu ayaikina bon. Araasi kesi nu abeitos togo loka a Papa kec, arai bo nat nu abeitos togo loka Okilenikec. Ikiliok lu Yudayan, mam acamakitai einer ka angor keere iriamakinos kiding orot. Mam apodokitai ejautene loka angor neduc ajaatatar kesi toma akiro acie kere nuapolok nu eswamasi.
- **Araasi angor nu ekisilikitai kotoma Ojautene kec lo Aima Edeke.** Araasi kesi nu acamakitai alosit “aiboisit na atiakakitai Angor” kotoma Oyekalu. Mam apedorete aisiom akirot naka Edeke, arai aimoriaikin kalucie itunga Aima Edeke kotoma naka Eyekalu.
- **Kakere Alemaritai Angor kotoma adumun Asioman.** Kwape araar asioman ne etolosio kotoma osomeri lu ajaasi toma Atukosia (Aboisio nu Ailip / Aima), mam acamakitai apesur aimoriaikin toma.
- **Amameototor angor kede apedorosio Kokisila.** Mam apedorete aibee alupok araun nukec, adumun airumunet, arai bo nat kesi alacakin ekilokit kec. Mam acamakitai angor arautu ajenak Okooti loka Ikisila aitodol kito ne itogogongooro ekilokit ecie aitiajaar akiroto ke kwape nu abeit.

Kakere, kotoma Oinono loka apakio nuka Yesu Kakere, eteiyo angor kwape nu adite amunonut, nu adite aijen, ido nu mam ajenete nu omoyo.

Iwaitin Luka Yesu

Eipone lo ajaatatar aomisio nuka Yesu mama ejaasi angor etegelikina noi kakere aitelekaar eonono Ke. Abu oyaite ikiliok ka angor nepepe ka angosibib ka aitubusikina naeriana. Angor kotoma apakio Ke nuka Yesu, mam ajenutos arai ariamun ka Etunganan lokilokit bala nat Yesu.

- **Abu Yesu oyaite angor nepepe ka angosibib ka aitubusikina na apol noi.** Abu ineranansi ka angor kotunga. Abu Yesu inerata ka aberu na Asamariat na arai olongwau ido “akadiakanaran naepol” (Yokana 4:7). Abu iner ka Asianut, Abeit ka Ajokis naka Etao mama ejai aberu na ekamunitai kotoma adoteu (Yokana 8:1-11). Abu Yesu ogea aijaanakin Ke kotoma Aomisioit na abu totoke olimunite (Yokana 2: 1-11)
- **Abu Yesu ijaanakini mama ajaasi angor ido oyaite angin adiopet kakesi kwape itunganan.** Abu Yesu odolonokini ijautenesia luka angor kwape itunga lu ajai kesi da ameda eirian kwape ka ikiliok lu epudasi aitangaleunio ka aitajario. Abu itapalau ikisila lu ainakit Musa lu etikokitos atiror aberu na edeka elap (*Alele naka aokot*)

(Marako 5:25-34). Abu itangaleu aberu na etwangalit adeka adaun ikaru itomon akany kauni kapedorosio nuka ajokin kosodi anyaara ngesi “Akoku naka Aburaam” (Luka 13:10-17). Abu itangaleu akoku naka aberu na Akanaanit (Matayo 15:22-28).





- **Abu kisisianak Angor.** Abu opodokite aingiseta kec ka Aikanikaneta kec ka etauke kere. Abu Yesu omunokinor akiro nu epolok nuka omoyo nu abeit mama ajaasi luarei kere angor ka ikiliok. Abu Yesu isisianak Mary, inacike Marita (Luka 10:38-42). Angor kesi nusodit aanyun Ejakait lo Ajarunan Okatwak ido aponi kolimokinai ayangaar akiro nuka Jokak mama ejaasi Ikesisiak (Yokana 20:1-18). Epuu noi angor nu aupasi ka Yesu ka aigangite Aijaanakin Ke (Luka 8:1-3) Kwa ajaar isisianakini Ikesisiak Ke ka ikodeta.

Aingiseta Nu Emorio Aitamitam:

1. Koipone bo ti aani itetemuuna ijo eipone lo ayaitere angor kotoma oinono loka Yesu?
2. Biyai Yesu abu Ngesi da oyaite angor oipone kangope kongon, arai etegelikina atia Einono Ke?
3. Biyai ejaasi acie nu eputoorito kiding eipone lo eyangaaritor einono kon angor ka eipone lo ayangaaritor einono loka Yesu angor?
4. Nunyoika acie kotoma aitegelikineta kiding naka eipone lo abu Yesu oyangaaritor angor ka eipone lo abu einono Ke oyaitor angor?
5. Koipone aani iwomitor ijo apotu angor opupuniata ne abu Yesu oyaiya kesi koipene kalo?
6. Nunyoika aanyununeta acie nu itoduutotor ikanisan wok inonosio wok aitelekaar eipone lo abu Yesu oyaitor angor?

Asisian 6: Atutubet Wok

Omorata einer nepepe nu ikamunitos angoni ewai kosodete aileleb apapula naa (*abaagan nu ideununitai*) nepepe kede atiokisio nu iseseni ijo kotoma atutubet kon ido orai eipone lo eyaitere angor kede apesur, kosodi aomisio / arai akiro aarei nuka angin adiope owaitin lu ipedori ijo aswamu kanu ayaite angor kede apesur koipone lo angosibib, ayongio ka ameda naepol.

Ewai	Eyaitene lo Aronon ka Amamus Ainakite Ajokision Eirian	Nu ipedori Ooni Aiswamaun (akiro / aomisioit 1-2 kangoli Ewai)
 <p>Ekale</p>		
 <p>Ekanisa</p>		
 <p>Esomero</p>		
 <p>Toma Atutubet</p>		

- Lunyoika ti iboro iyarei lu iswamau ijo itegelikina kotoma orekon kanu ainakin akoniberu angosibib, ka aduwe kon nupesur?
- Lunyoika ti iboro iyarei lu iswamau ijo itegelikina kotoma atutubete kon kanu aitubusikina angor ka apesur kotoma atutubet?

Komorata kayenicie nu iinakina ijo aiswamu. Aso ilipakinos bonik ka bonik ido ilipata Edeke ingarak aiswamaun iboro luu.

Asisian 7: Aingarakin Iduwe Apoloo

“itutuo (itanaik) ikoku erot loibusakinit aloseneno, ido karaida emojong mam enyouni kanen”.

Awaragasia 22:6

Apoloo Komoyo

“Akiro nuu da nukecorakini lolo kojaananas otaukon ido odunyakinite aisisianakin kesi ikoniduwe kinerenena da kes iboienenei kotogokon, ilosenenei korot, iperenenei, inyouunenei da.” Ikisila 6:6-7

1. Aimor Ailipenen Okale arai Asiomene Ebaibuli Nepepe kwape Ekale

Kotam adumun apak angin apaaran aisom Ebaibuli ka Aitataminikin iduwe kon. akiro nu aswamasi ko Obaibuli / Awragaasia nu Obaibuli. Ingarak kesi amisiikin nu itatamit Ebaibuli. idau ijo aitataminikin kesi ewai lo isiomokit ijo kesi, ingit kesi aingiseta kwape nat – Nunyoika ipedori oni aisisiaun nu ikamunitos Edeke kotoma akirot kan / awaragan kana / kotoma okokoron kalu? Nunyoika ipedori ooni aisisiaun nu ikamunitos eipone lo ebeitor oni ajaria? (*Eipone lo ebeitor oni ajautor oponesio wok*)?

2. Ailipenen nepepe Keda iduwe wok

ibusakinit ooni duc atiakunit apak na ailipenen nepepe ka iduwe wok. Koseu esawa lo duc ejaar ijo apak. Koany ebe ayangaikini ijo apak ngin apupokin nu ekotosi iduwe kon aimor einer ka ijo, nu eomitos kesi, nu itapasete kesi, ka ijo da aimor ka kesi kosodi aimor ailip nepepe ka kesi. Ne erokotor edisiak, eminas olimokisi ijo nu ekotosi kesi ijo ailip, kosodi jio ailip ailipasit na euriana. Kwape epolooto, epedorete kesi da kwana ageari ailipenen koipone kec bon. Ingarak kesi ojenutu / arai koanyutu ne ebongokina Edeke ailipasia kec.

3. Ayangainikin Apak Aiboyenen Nepepe Kede iduwe wok

inerananata nu ikamunitos Edeke angin apak keere na ijaatatar yesi nepepe. Isisianak kesi nu ikamunitos Edeke. ipedori ijo alimun nu akirot adio na ikamunit eipone lo eminar Edeke ooni noi kosodi Ngesi ainakin oni ikito kanu ainakite oni etolim, akito nu ipoere, inyammat, nepepe ka aitubusite akwapu wok. iner nu ikamunitos eipone lo eraar akwapu kere naka Edeke, ido ainakin ooni epelu loka aidarenen ngesi. Ekoto ijo duc aanyun iwaitin lu aingarakin iduwe kon aanyun Edeke kotoma angin ibore kere.

Apoloo Kotoma Acoa / Kotoma Adam / Kotoma Aijen

“Okokuka, iira ijo aituutuor naka Papakon, Siri ingere da aicor (aisisianakin) naka Totokon.”

Awaragasia 1:8

1. Isisianak iduwe Ludidik noi ore

Kotam aiteteminikin kesi iboro ne erokotor edisiak ido ipu aingiseta. Isisianak kesi **ABC’s** ka Aimar isuulai 1,2,3,..., ikiroria luka iriagin, ka iboro lu isadai (Lo isongotot **“Triangle”**, Lo isomelel oriakasi isodai **“square”**, Lolungur **“circle”**, ka icie da **“etc”**). Arai erai aisisianakin iduwe duc, ocamak kesi aseun kotoma akiro / arai iboro iyarei / asekuneta aarei nemam eraatatar nu epolok noi. Kwape na aanyunet, *“Biyai ijo ikoto lolo ainap esaati lo arengan arai bo esaati lo Bululu?”* oyangaik apak abongonokin aingiseta kec!

2. Oyanga iduwe Lu adol Asioaman Osomero

Acie apakio ibusakinit ooni acamun aipal icie iboro luipu kanu ayangaar iduwe wok toma osomero, konye erai bobo nada ewai lo epolok nuke noi kakere lo arautu aurian. Kotoma

asioman iinakini ooni iduwe wok arerengusio nu koingaren. Mam ooni ijeni ainapeta nu ejaatatar Edeke kanuka iduwe wok, konye ekoto ooni aanyun ebee ejaatatar kesi arerengu na airereor nu elosokinitos asekun. Emina Edeke oseku ikokukon ayangaun aijulakinet naepol noi toma atutubetekus. Irwana duc, ipudasi kesi asioman ka aitutuoro kanu aismamaun ngun. Nu ipali ijo nuipu kanu ikokukon alosit osomero lolo emina ocamak ngesi apedor iyatakin aticepak kitoni O' Univasiti kosodi koingaren aingarakin ekale kon. Kanu aiyareikin aitoploloun eidicane nepepe keda Edeke, erai asioman ediope ewai lo epolok nuke kakere kanu aingarakin kesi ajaun ka aijar naejok noi koingaren. Koanyu ebe ijaikini ijo ikokukon iwaitin luu kere iyarei.

Apoloo Onaanara Kalucie itunga

"Siri ibitiono (siri ipodokit nukon ilopet bon) kopodokite nu aluciekon (kitopoloorite angin itunganan oupake) aitelekaarit nukon bon." Ipilipin 2: 3.

1. Aisisianakin iduwe eipone lo ebeitor kesi apoloo iswamaanara / Enaanara Kalucie .

Kosiom angin ekokoro. Nunyoika isisiauni ooni kama ejaasi ikokoron luu nu epolok noi ibbusakint aisisianakin iduwe wok?

- Ipilipin 2:3
- Ikolosain 3:13, 15
- Matayo 5:44
- 1 Ikorinton 13:4-5
- Matayo 7:12

Ingarakit Ebaibuli ooni amisiikin ajokis na aiboyenen kainapakin /ajautu kainapakin nepepe kalucie, kominanena angin itunganan, kotitingikite, kosiana, itimenenei, kasodote ayaite lucie kwape ikotor oyaitete oni. Erai ibore yeni ibusakinit noi ainerenen nu ikamunitos akiro ngun nepepe kede iduwe wok ne erokotor kesi edisiak ido da kwape epolookorotor kesi ka iidicasinei kec aijulakin.

2. Korai aanyunet. Isisiaunete iduwe eipone lo aismamaanara kalucie itunga koipone lo asesin Ikama ejaasi lucie, noi noi kakere, auriaka kec. Eipone lo iswamaanaratar / inaanaratar ijo kalucie itunga ngesi erai aanyunet na angin apaaran mama ejaasi iduwekon. Kiito eipone lo iswamaanaratar ijo kalucie itunga ido ti eipone lo ekotor Edeke ijo aismamaanara / anaanara kakesi kwape kanu isisiai ooni kotoma Obaibuli.

- Owaitin bo aanu iraar ijo aanyunet najokan mama ejaasi iduwekon?
- Kowaitin bo ti aanu ikotor ijo araun aanyunet na ejokunar noi adepar nepepe kotoma aingarakinio naka Edeke?

3. Ingarak iduwe kon aitemonokin atiokisio / ainingosia kotoma oidicasinei kec ne elomuniata.

Irwana ipu , mam iduwe elimokinete ijo nu ikamunitos ainingosia / atiokisio nu ejaatatar kesi nepepe kalucie itunga, konye eminasi ogeasi aijulakin koipone lo iswamaatar kesi iboro itegelikina noi. imina ijo omisiik aiyatakina na anyunyura, amumuu kalucie, arai bo aililing komam ekotosi einer ka idio itunganan, agitar aiboi awai bon, agola ke bon, kwap na ekitoi bo mere kalucie. Erai na aanyunet ebee emina ojaasi ka ationis nepepe kalucie itunga. Ipudasi iduwe aingarakinio ka aisinyikoikinio einer nu ikamunitos akiro ngun ka aisisiaun ayaite lucie ejok karaida ne epupiotor kesi aitipipilio, anyunyura arai bo nat arautu lu eyaito lucie erono. Ocamaki kesi omorata aitatamuun nu eswamaunos, eipone lo epupotor kesi ka eipone lo eswamaunatar kesi aitemokinia. Aimor kakesi einer kalo, erai aanyunet mama ejai ikoku naka eidicane lo eminana, acamunit ka ajautu ka etau lo esiana neke. Eraasi nu nuepolok noi kotoma okaru lu eiditeu tetere kesi emunokinos ijo aingarakin kesi kotoma akirosinei kanu.

- Lunyoika bo icie kotoma owaitin lu ipedoria ijo aingarakin ikokukon aomoom nuejok nu ikamunitos lucie ka ayaite kesi nepepe ka amina ka asianut naka etau?

iidicasinei wok nepepe kalucie erai ibore yeni epol noi. Arautu yeni ibitiono / yeni ipodo nukon bon erai eipone loejaenena toma angin itunganan, konye mam erai lo italakaarit Edeke. Ekoto ooni aisisianakin iduwe wok aomit nuejok kanuka kalucie ka ayaite kesi koipone kalo ejok noi adepar eipone lo ekotototor kesi oyaitete kesi. Akiro nu epol atupakin ekoto orai nu imoriaritai aisisianakinio ka aitodiario kotoma aijar wok kwape na aanyunet kanuka iduwe wok.

Apoloo Kotoma Akuwan

- Lunyoika bo icie kotoma owaitim lu ipedoria ooni aingarakin iduwe wok apoloo kakuwan?

Iboro Luu Kere ingarakinete iduwe wok arautu lu engaleete kotoma akuwan. idiope iboro lu epolok lu ibusakinit ooni aswamu kanu aisipedoor iduwe wok apoloo ongaleikitos ojokan ngesi ooni aanyun ebe idumanakinenei ooni kesi (edumunete kesi) inyammat lu ijulijulio (Ekoto ojai aijul eode) angin apaaran. Kanu adama kec adukun ka apoloor aswamu ejok, ibusakinit ooni aanyun ebe ejaasi kesi kede aijul eode loejok.

Ekisil lo 1+3:

- idiopet (1+...) egwoikit emuceeri / arai inyammat lu idilas ateker kangin / arai lu eputooro kanges (emuceeri). Ibusakinit ooni ainyam emuceeri arai icie onyammat lu eburokitos ngesi kangin apaaran nepepe kede icie ibore kotoma angin idiopet kotoma ogurupun lucie iuni (3) luka inyammat.
- iuni (.+3) egwoikitos lucie igurupun iuni (3) luka inyammat lu ebeit aitam ainyalanakin angin apaaran:
 - **Egurupu lo 1 – Protein** (lu edukete akuwan) kwape nat: Abeei, Akile, emaroge, agaria ka akiring.
 - **Egurupu lo 2** – Araitto ka idiasio lukuwii / ibogai (ileleba kede **vitamins** ka iinyaleta lu egelegela “**nutrients**”).
 - **Egurupu lo 3** – Akinyeta ka asiapai (ipudai orai na edite noi).

Ayangaik Apak ijo Ber Bon Aitoonor Nu isisiau

- Iboro inyoika lu ijai ijo ilemu sek iswamai ojokan kanu aingarakina iduwe kon apoloo?
- Aanu bo iwaitin lu ikoto ijo aiyatakin apodokin aishwamaenen noi noi kakere?
- Nunyoika aomisio nu itetiak nu idumu ijo kotoma aisisianakin kana nu ikamunitos nu ipedori ijo aswamu kanu aingarakinia iduwe kon apoloo?

Asisian 8: iwaitin Lu Airanar / Aiswamaun Nu Ikamanara kede Iduwe

“Mam eong etau ekoto ikoku yen didi yen! Esil noi !”

“Erai Emwalimu ka Ebang!”

“Abu ngesi onang eong! Mam bobo eong ecaki abolia kede ngesi nepecepe da!”

Nanyoin ti abongokinet na erasakini alomun / na iriamara ojokan kama ejai aurian mama ejai ikoku yen ikaru 6 lu apolou kanu angin adiopet alimununeta angun iwadikautai kokuju?

Ejaasi iwaitin lu egelegela lu ibongokina ooni ne itodiarata iduwe iponesio lu mam ejokuka / ne itodiarata iponesio lu arokok. Irwana ipu, mam ooni iomoomoi nu ikamunitos eipone lo epupiata iduwe Erika ooni ebongokina. Kanu angun, mam ooni itamanakini ajaikin iduwe amisiikin eipone lo eputiata aomisio kec. Konye idumuni ijo ebe epatanikit ooni duc aswamu adiopet kotoma akiro nu okwapu nuta:

Apegakin: ‘ijo da Aa. Mam epedori eroko noi kwangin.’ ‘Musiki mam ijo ipeleikit nu ibala ijo / arai nu ijai ijo aswamu ngun.’

Atiakite itunga ibongonikini: ‘Emamei ber ibore ipedori ijo aiswamaun kanu angun da — inyek aitepeg eong.’ ‘iisu ! Ejai ijo alosite osomero.’ ‘Arai moolo ikoto ijo adumun aswamu na ajokan, erai ijo alosite osomero.’

Aicoretait: ‘Ekoto ijo aswamu agogong aanyun ebe esalakinete ipaperokon ka ijo, konye tai, isalakini ijo isilikinit ido orai obonipe.’ ‘Ekoto ijo da aisisiaun ainyanganar.’

Etube: ‘Erono bo lolo alimunet ngin biyai !’ ‘Ekoto ijo iswamaiikite je icie ibore”.’

Aingiseta: ‘inyobo abu ijo iswamau?’ ‘Kanuinyo ilimuna ijo iboro lu arokok kwangin”?’

Ayuario naka itunganan ayi: ‘Arai ngesi apese najokan””.’ ‘Ajeni eong mam ngesi apeleikit”.’

Ayangaik Apak ijo Ber Bon Aitoonor Nu isisiau:

Koipone aani iwomitor ijo ti ejaunor abongokinet kon mama ejai ikokou yen ejaasi nepepe ka angin adiopet kotoma aanyununeta kanu?

Biyai ijo iwomit ti ijo ijaatatar abongonokineta nu eputosi kwa adio kangun nu imor oni aitamitam?

Asisian 8: Akiro Nu Epol Atupakin kotoma Apupokin (Airar)

Apupokinite (Airar) Ojokan

Apupokinite (Airar) ka acoite noi mama ejai ikoku ingarakini kesi aitereikin kede eipone lo epupiotor aomisio kec koipone kalo ajokan, aibois na kesi aitodiar iponesio lu arokok. Ingarakini kesi aisiaun eipone lo itemonokinet atiokisio kosodi ainakin kesi apirianut na ipudasi kesi kanu aisipedor kesi moolo araun itunga lu apolok lu etiokitos aomisio. Ingarakini kesi apup ojokan noi nu ikamunitos ejautene kec ka aisiaun ajautu ka iponesio lu ejokuka otunga. Erai adiopot kotoma apirianuto nu epol ajokis noi kotoma aitopoloun iduwe.

Ne itamakitor ooni aisinyikoikit ikoku alemar awai aomisio nu arokok nu enyunyuraka, idala duc ikoku aiyatakin aitikadikin noi. Epedorete iduwe anaikin iponesio luipu lu ejaunotor aomisio kec ka amoun eipone lo itemonokinet kesi ikulepek bon ne epedoria ooni apoponokin kesi (Airar kesi) kasodete aitetemoonor aitwasam Akiro Nu Epol Atupakinit nuu:

Akiro Nu Epol Atupakin Nuka Airar (Apupokin) Ka Abongonokin Eipone Lo Epupiata Aomisio nuka iduwe

Kanu Apupun (Airar) Ojokan nuka iduwe wok, ibusakinit ooni aswamu iboro iuni (3):

1. Opupok (iira) ka Aomisio kon keere:

- Epatanikini ikoku arai iswamau ijo ibore yen itoduunit ebe iinakit ijo ngesi aomisio kon kere. Kwape na aanyunet, aibwaikin apaapula na iyemuto kwapu, kosodi aitee ikoku, aibelokin aiteikin kede ikoku, alomun ojokooni / opimbiri kosodi aiboikin kwapu apupokin nuke.
- Etionikit iduwe aitereikin ka aomisio nu epipil koipone kec bon. Arai emameun yeni ingarakini kesi, epedoreke aomisio ngun ainuun kesi noi ido iwanyuni ijo duc itodiaro kotoma oponesio lu arokok lu mam ejokuka.

2. Omisiik Eipone Lo Epupiata Aomisio kec:

- Kitwasam alimunet / arai akirot kwape – ‘Oooh’, ‘Eiii’ arai bo ‘Mmm’, ‘Otukuui’, ‘Ehee’, ‘Eeba’ arai bo ‘Ajenu do eong’
- itwasam acie kotoma aitodiareta nu apupokinite kon komam alimun akirot – Aimunganikin akou, aiteikite akonye kus, aitodiar ka ereete kon kotupitete nu elimunit ngesi.
- Siri ijaik kesi apaupun erono kanuka ajautu kede aomisio kwa kangun, kede iduwe ba, ibusakit ooni acamun eipone lo epupiatar aomisio kec kasodete aingarakin kesi aitereikin ka aomisio nu itipipiluna komam itodiarete iponesio lu arokok.

3. Ingarak Kesi Ajenun Kwa Epupiata Kesi:

- Ingarak kesi aitwasam akiro nu itodiaritos eipone lo epupiatar aomisio kec kanu aitoduunia nu itodikitos iponesio kec ijo. Kwape naanyunet, “*Etakina abu ibore ngin ayangau ileic noi mama ijai ijo.*”
- Mam duc iduwe epedoritos aitodikin ijo eipone lo epupiatar. Arai iswamaa ijo nuu mama kec, epupunete ebe imisiikit ijo kesi ido icamunit ijo kesi. Eminas duc apupun aisinapikinio ido inapakinis atipet. Mam iyalongongo arai mam ijo irasakini adeyaar kwa ebeitor. Ilimokini ijo ikokukon arai mam ijo abu omisiikite.

Aanu bo acie kotoma aanyununeta nu idilas nu “eipone lo aomisio” nu ejaatatar iduwe?

Asisian 9: Einer Lo Itojokaarit

Ikokoron Lu Obaibuli lu Epolok / Lu itacautos

- Ikolosain 3:21 Kosodi Ipeson 6:4
Ebala Ebaibuli elimokinit ooni ebe Siri oni ijaikini iduwe wok aitunyunyurinikin, ajaun ka adwaris, arai aitamemeun ajokis.
- Awaragasia 12:18
Isiitikit ooni ekokoro lo ebe ibusakinit ooni acoite noi tetere oni iseunenei akiro nu eraasi aitangaleunio mere nu imusungete / Nu itipipilete.

Akiro Nu itipipilete / Akiro Nu imusungete

Akiro nu itipipilete kesi iboro lu ilumununei ooni lu imusungete aomisio nuka ayenicie Irwana ipu, mam ooni ipeleikini aitiipil itunganan. Kotoma abeit, iboro lu elimununo kanu ti aisinyikoikina ikoku aijulakin, konye nu ejaunos kesi nuta ebe itipipilete ikoku. Aiboisit na aijulakin iyuuni ikoku nu alimokin / nu apupu, itikadikinos aomisio ke / ipirisaar amuno ke ido itanangi aitam araun yeni ejokunar adapar.

Akiro nu itipipilete noi kakere elomunete odiopet kowaitin kaluta:

- **Akiro nu elimunio kotoma anyunyura ka Amuno na etikadikin**
 - Irwana ipu, mam ooni ipeleikit nu ilimunit ooni. Na aanyunet, “Orai kolo omam ourutete da!”
- **Amainikineta Nu iinakini ooni iduwe**
 - Ne iswamaunatar iduwe idio ibore yeni mam ooni isialamikit, imina duc ooni aipaun alimun icie ibore yeni ikamanara kede ikoku aiboisit na iponesio (na aanyunet, “Tai emameun ajokis kon oingaren (Yeni tai),” arai bo “ibangaana ijo,” (“Yen imajingign yen”).
- **Aitupusitor**
 - Erai ibore yeni epatana aitupusoor ikoku kede inacan ke arai ainacana ke. “Orai ijo da ikoni bala onacekon,” arai bo “Mam ngesi ecoo bala inacike”
- **Adwaranakineta**
 - Imina oni aticepak alimonokin kesi nu epote aiswamaun koingaren (na aanyunet, “mam ijo icaki adumun aswamu nepecep da,” arai bo “isubit ijo bala Mamai kon. Ibuni ijo aputoor cut bala ngesi. ”
- **Einer nu Emunaritos lucie**
 - Acie apakio inera oni numam ejokuka nu ikamunitos iduwe wok mama ejaasi lucie itunga opupete kesi oni inera (na aanyunet, “Okooka abu ibiror bobo aingito ke. Ijalijalana tai,” arai bo nat “Erai na Akooka. Erienguut tai ikoni nen / ipaliono noi ikoni nen !”

Irwana duc akiro nu itipipilete nuu iswamaunete nu arokok numam oni ikoto kotoma aijara naka iduwe wok. Kwape na aanyunet, ikoto ooni aanyun iduwe wok iswamaete agogong, konye ne epupuniatar akiro nuu ijaikini kesi acamun ebee mam kesi epedorete aiswamaun idio ibore ojokan. Kanu angun, itanangete atamanar aswamu ejok. Akiro nu itipipilete epedorete aitanang iduwe wok kotoma araun ngun keere lu etemokit / akotor Edeke kesi araun.

Akiro Nu Epol Atupakin Kanu Oiner Lo Itojokaarit

1. **Itetemik ikoku ibore yen erai abeit atipet arai ibu ijo olimunite yeni mam arai yeni abeit.**

Arai da yeni abu ijo olimunite, mam ijo ipeleikit. Erai na itanangi amamus amisiikinio na eyangaikini aojau.

2. **Obilakin ailip Aitimio kosodi Einer ka Aitojokaarit akaulo na Alimun / einer akiro nu itipipilitos kotoma anyunyura.**

Einakini na ikoku kon aanyunet naka abilakin ailip aitimio na epedori ngesi atupakin. Einakini da ngesi arerengu na abilakin ailip aitimio arai iriamara kanu aiswamaun nu apotu ijaikisi ijo anyunyurikin. Epote iduwe ainakit ijo angosibib noi arai ibilanikin ijo ailip aitimio ne duc ibucara ijo ido edumunete aisinyikoikinio na aitalakaarit ijo.

3. **Itetemu iponesio lu mam ijo iyalamar / arai lu itikadikitos ijo aiboisit na aimarakit ikoku. Obala ebe.**

Atemar, "Erai ngin ibore yeni abangaanut noi aiswamaun !" Erai nuejok aitwasam ido mam itipipili aomisio kec noi atia atemar, " ibangaana ijo !"

4. **Siri ituputoo iduwe kon ka yenicie kakesi**

Aituputoonor ijaikini iduwe aipup erono nu ikamunitos aijarakec ido eyangauni aitikadikinio. ijaikini iduwe kon amamus aminanara ka amamus aimor aiswamanara nepepe ojokan.

5. **Only say positive things about your child when it is possible for him to hear you. Inerenena bon iboro lu itojokaaritor ijo ikokukon ne epedoritor ngesi apupokin (airar) ijo.**

6. **Siri itodiari ikokukon nepepe ka iponesio lu arokok / arai aswamusinei numam ejokuka.**

Ainanikin Akiro Nu isinyikoinikinet

Aiboisit na aitwasam akiro nu itipipilete / imusungete, ibusakinit ooni adumun arerengusio kowaitin kere lu ipedora ijo aisinyikoinikina iduwe wok. Aso koomoomou iboro 5 lu ti ipedori ijo alimun kanu aisinyikoikina angin idiopet kotoma oduwe kon. Ne ipedora ijo aitebeinikin nu itojokaaritor ijo kesi, ngesi do ejokiar kakere:

Naanyunet: "Esialamikit eong eipone loduc ingaranakinia ijo eong ojokoوني akaulo na ibongunia ijo osomero. Ejok ayangaikit apak nepepe kajo ido itapatanit ijo aswamuka." (Ejok alimun kwangen noi ido itebeikite atai atemar "irai ijo apese najokan noi.")

Asisian 10: Aleconor iduwe

Kosiom Awaragasia 29: 17 ka 13: 24.

Aiyeiyea Kanu Alecor Na ingarakini

Alecor apolouke ebe aicoranakin ka aitetenaanar iduwe aisisiaun aswamu iboro kotoma owaitin lu ayongite Edeke. Mam Alecor erai do apolou ke bon aiticanaenen. Ejaasi iwaitin lu egelegela lu aleconor iduwe. Erai alecor ibore yen ejok arai iswamai kotoma amina ido orai ibore yen inyikokitai atupakinite.

ileconori ooni iduwe wok naarai imina ooni kesi ido ikoto ooni kesi aisisiaun eipone lo ojarete kotoma ayongite Edeke ka aitolomuunun asekununeta nuajokak, ido aisisiaun ayaite lucie ejok. Apakio acie eipone lo ileconora ooni iduwe wok mam erai lo ingarakini naarai emina ayangaunun aimwang ka aipaliikin oni, adwaris, aitipipilio naka itawon, ileuc, akurianu ka ajurungungit (*amamus aipup ayuwaara*). Erai ibore yeni epol ameda noi ooni amisiikin nu ipedori ooni aiswamaun kanu aijaikin alecor wok orai naejok na ingarakini aitetenaar ka aisipedor iduwe apoloo kitoni ationere / agogongor kotoma oidicane kec kalucie nepepe ka Edeke.

1. Koany ebe ejenete iduwe ebe imina ooni kesi Ne ijaar oni alecor kesi.

- Mam ekoto ijo alecor ikokukon nepecep da apak / osawa lo ipupia ijo anyunyura. Erai nen na isisiakini ikoku aibunga / ainom yenicie arai bo eresianakin lucie ne enyunyurikinotor. Arai ipupi ijo anyunyura noi, otam ber adumun ainapakin, kosodi alimokin ikokukon iboikin osiepi je laiye aitodol ne inapakinor ijo.
- Koanyu ebe isiitik kesi alosikinite naka alecor / ainakin kesi aitanet erai aisisianakin kesi eipone lo ajautu ka iponesio luajokak mama ejaasi lucie. Itetemik kesi ebe erai lo epelu kon kwape aurian ido kanu naarai imina ijo kesi, ileconori ijo kesi.
- Akaulo na alecor ikoku, erai ibore yeni epol noi aitodiar aminakon na mam ogongakina mama ejai idio ibore kere kanukec. Ipedori da bobo ijo eineri akiro nu isinyikoikinite mama ejai ikoku, kwape nat, “acamuit eong ibuni ijo apedor asekun asekunet naejok noi koingaren” arai bo “acamunit eong ibuni ijo aisisiaun amina / aiswamaikin onacekon ajokis”. Amina erai aisinyikoikinite na ejok noi adepar akurianu. Erai da bobo na na ingarakini ikoku aipup ayuwaara ka ajenun ebe erokoi emina kesi.

2. Orai yeni iducokinit / itupakinit kotoma Aleconor kon.

- Arai icamak ooni iduwe aswamu icie ibore yeni mam ejok lolo ido alecor aciepak, itolitolikini ibore ngin iduwe amamus ajenun aani bo ibore ebeit kesi aswamu, dobo aani bo mam kesi ebeit aswamu. Eraunete lu ekuriakata ebe aticepak ibucasi aiswamaun ibore yeni aronon.
- Arai irai ooni lu itupakinit nuka alecor, epote iduwe aisisiaun ibore yeni ajokan ka yeni aronon. Epote kesi apupun ayuwaara naarai ejenete kesi ebe ejaasi auriak kec idarete kesi / epodokitos kesi ido eminas kesi.

3. Koany ebee emisiikini ikoku nu abu iswamaute nu adiakara / arai nu arokok.

- Ingitu ikoku arai ejeni ngesi nu iswamaut ngesi nu eroko / arai adiakaret. Arai mam ejenete, Ka ainapakina itetemik.

- **MAM NEPECEP** ilecori ikoku / noi noi kakere ibitar ikoku komam inerakina kede kesi nu ikamunitos nu iswamautos kesi numam ejokuka / nu ediakaritos iswamaun.
- 4. Itetemik nu ipudakinai kanuka iponesio luajokak lu ikoto ijo.**
- Apakio acie, mam iduwe ejenete nu ipudakinai kesi. Koinak iduwe ne ibusakinit kesi onangakinitos ka ne mam ibusakinit ido itacaunite ojokan (*eikoru kanu ecamakitai ka numam ecamakitai*).
 - Koany ebe emisiikit ikoku nu ikoto ijo kesi aswamu apak na ebunit koingaren (*eroko apak*).
- 5. Eipone loka alecoret / arai aiticanio ekoto itegelikina otupitete apolou / arai ikaru luka ikoku.**
- Iduwe ludidik ikaru (2-10) epedorio duc aiteten kede akongu na imikit ngesi aswamu ngun, koipone lo abitar, arai aisiboikin ngesi okoona je adaun apak adio na iriamara kede ikaru kec.
 - Iduwe lu epolok ikaru (11-18) emisiikinate arai imikaar kesi iboro lu eminakitos kesi noi, kosodete aitereikin kanu ayangautu iponesio (epali) kec / arai nu edupoo aseunet kec.
- 6. Alangiru / Apipilu naka alecoret ekoto oriakanara kede alangiru naka aibucaret na iswamaunitai.**
- Arai erono aibucaret noi, ekoto alecoret da opipil noi. Arai mam aibucaret erono noi, ekoto alecoret odite / orai na ebenen.
 - Mam erai na iriamara aimikaar ikoku ibore yeni emina ngesi noi adaun elap ediope, arai ibucarit ikoku irwana atipet bon. Ti eraun na iriamara ejok arai imikaar ngesi adaun apaaran adiope konye do arai iyatakin eipone ke ngon, ipedori do ijo aiyatakin apaarasia nuka aimikaar ngesi lu elelakinit ngesi.
- 7. Otupakinite nu ikamanara nepepe kede alecoret**
- Aiswamaenen nu inerenena ijo epedori orai nu etioko noi kopaana, konye erai nu epedorete aingarakin noi ido itolomunete ayongio ka amunokina. Itoduunit da bobo ebe ipodo ijo kesi noi ngesi iswamauna ibore icie.
 - Aimanite alecor / ainakin ikoku aiticanet kanuka iponesio lu arokok (*aswamisioit na aronon*), konye komam itupakini aiswamaun ngun akaulo na ibucara, itolitolikini ikoku akou ido mam ingarakini.
- 8. Ne epatanar, itwasam eipone / ewai loka alecor lo iriamara kotenan kede aibucaret.**
- Apeleikinet naka ewai kalo loka alecor, erai kanu aingarakin ikoku acamun aibwok egarama lo ayangau aibucaret ke ka ngesi amoun eipone lo aitemokin ipenesio ngun lu mam ejokuka.
 - Kwape aanyunet, Arai emina Sara aingaranakin Toto ke aipoo inyammat, konye abu iretanakini onaceke lo akoto ngesi da aingarakite oipone ecie, Ekoto Toto ke Sara alimokin ngesi ebe mam ijo kwana iyatakin aingarakin eong aitodol ijo acamakini onacekon da obu aingarakit. Arai bo, abu Petero onanga emeesa kosodete akipi abukor kwapu, ejaun Toto ke alimokin ngesi alemun aipuset kosodi ngesi aitalaun aiputar aiboisit ngin ojokan.

Aimor Aitamitam Ogurupu Lo Edit

1. Aanu kotoma kanu aiyeiyea nuu (*koipone lo alecor*) idau ijo aitwasam nepepe kede iduwe kon?

2. Aanu bo kotoma kanu aiyeiyea nuu mam lem ijo iwomoomotor nukec da, arai bo mam ipupuutor da?
3. Kosiom akirot (aitatamaet) naka Seth bobo ageaun kotoma kanu itegearete ke. Aso otupak angin adoketait kosodete aimor einer nu ikamunitos nu ti iswamau Papa ke Seth koipone kalo itegelikina kanu aibwaikin aswamisioit nu aiyeiyea nuu toma ojautene.

Ajaasi Set ka inacan ikanyikape lu apolok ka ainacan. Adiope apaaran ajaasi ainacan ke amwangit aitapasaenen ngesi kotoni ne eupiatar ngesi akiro ngun (esaraon gon). Abu onyunyurikin noi kosodi acakakin kesi agalon na akipi naepol noi. Abu agalon ngin ibir aarei kotoma ainacanake kosodete kwa agear aimongy Abu ijaake koany nu abu ngesi iswamau kosodi aiworokin Papa ke. Abu Papa ke odolu atipet noi kosodi agear iretanakin Set. Angin itunganan keere akuriana, kitoni iidunyeta da lu asesene. Abu inom Set irwana 4 arai 5 ka arokoba kosodi alimokin ebe siri ngesi etamaki bobo nepecep da aishwamaun kwangin, arai irucaki bobo, emeni alosit iwala akwapu. Abu Set onyunyurikin noi mama ejaasi ainacan ke. Iwala akwapu, abu adiope kotoma ainacana ke ogea emwangit ka aitapas ngesi. angin itunganan keere abu okweni. Kosodi Set aibap inacike. Lolo kana, abu Papa kokwenia akweniar nepepe kalucie Itunga.

Koyangaik Ber ijo Bon Apak Aomoom Nu Isisiau

1. Aanu bo iboro lu teni iswamaenenete iduwe kon lu itunyunyurikinete ijo? Aanu bo iboro kotenan lu ipedori ijo aishwamaun kanu aisinapikinia anyunyura eroko ijo elecoro iduwe kon?
2. Nunyoika ipedori ijo aishwamaun kanu aitodikina iduwe kon ebe ijai ijo alecor kesi naarai imina kesi?
3. Aani bo idiope ibore yeni itetet ibuni ijo aswamu ne ilecoria ijo iduwe kon koingaren?

Iwaitin icie kanu Aleconora iduwe

Konye komam Erai Ducu duc, Erai ibore yeni iriamara abitar ikoku yen didi (ikaru 2-10).

Abitar itegelikina kama ejai ainominom / aibungaa ikoku. Arai ebeit ijo abitar ikoku, idarak ber aitodol ne ipupunia ijo ebe enapakin anyunyura kon, oyanga kesi aiboisit na egitara awai kama ejaasi lucie, itetemik kanuinyo ijaar ijo abitanar kesi, kosodi konyet do abitanar kesi. Siri kibitana ikoku oingaren naka lucie. Epedori eipone ngon araun lo isurumaari ileic, ido eyangauni (edukuni) adwaris naka etau. Akaulo naka alecor, ekoto ijo ainuu kesi kosodi aisiirikin (aitigogongikin) kesi ojokan nuka amina kon. Abitar iswamaunio kanuka alecor ido **era i amina ijaikini iswamaunio** tetere ijulakinio ipenesio ke lu amoi oingaren. Mam ekoto oyangau aimusungio naka akuwan arai bo nat mam abitar ngin ekoto orai na etenyunit anyunyura. Arai itwasamai ka acoa, epedori araun eipone lo ingarakini aitikokin ipenesio lu arokok kosodi aisinyikoikin arimaarit ka apupio naka ayuwaara. Arai icebok ijo abitanar ikoku ducu duc, epedorete itawon kec araun lu itinikikitai ido ipalioko (*omwangaka*).

Aleconor ikoku kon mam era i apolouke ebe aipot kesi / aibunga kesi. Aitipipil akuwan **MAM** era i ngesi bon eipone lo aleconora iduwe. Luu kesi icie kotoma owaitin lu epedorio aitwasam aburokina aibunga / arai bo aipot iduwe (aitipipil akuwan) ido oraasi lu epedorete arautu lu ingarakinete da noi ojokan:

- ❑ Koinak ikoku ***aswamisioit na ingarakini***, atia ipenesio lu mam ecamuna
- ❑ Itodia ***amamus acamunit naepol*** (komam isurokit eipone loka ikoku)
- ❑ ***Olema / imikaa Ajokisio ke. (Olema / imikaa iboro Lu eminakitos kesi noi)***
- ❑ Itodik ikoku ***eipone lo ebeitor ngesi aibwok ngun nu iswamaunit ngesi***
- ❑ **Ogita ikoku awai kama ejaasi Lucie** – “Apak Na ngesi ajaun bon”
- ❑ ***Koinak / Ocamak Aseunet*** - ipenesio luajokak arai nu iduporete ipenesio lu arokok iswamaunos / aitikokinet
- ❑ Ocamak ikoku ***itereikonos kede alecoret na ayangau aswamisioit kec*** lu mam ejokuka.

Aimor Aitamitam Ogurupu Lo Edit

1. Oomoom ejautene nepepe kede iduwe kon ore ne duc ipaliokotor / itodiaritotor emwangit arai ne itodiaritotor kesi iponesio lu mam ejokuka.
2. Itwasamai aomisio nu kopekwana idau ooni aimor aitamitam kwape iwaitin icie lu ejokuka lu alecora aiboisit na aitipipil akuwan / aibunga. itemonok aboliasit adiope itwasamai iwaitin lu itetiak lu isisiau ijo.
3. itolomu aboliasit kanu egurupu keere. Ingit ngun lu esesenete aanu bo iwaitin icie lu ejokuka luka aleconor iduwe lu itodiaritai kotoma aboliasit.